

Observaziun dal gaud e mirs sitgs

■ (cc) La regenza grischuna ha concludì la participaziun dal chantun ad in program interchantunal d'observaziun dal gaud. Ultra da quai ha la regenza tractà differentas fatschentas da vischnancas e da regiuns. Il chantun Grischun sa participescha ils onns 2015 e 2016 al program interchantunal d'observaziun permanenta dal gaud. La regenza ha deliberà per quai ina contribuziun da totalmain 108 000 francs. L'import vegn repartì mintgamai per la mesadad sin ils onns 2015 e 2016. La finamira dal program è quella da constatar las midadas che capitàn plaun en il gaud – per exempel pervia da las immissiuns da substanzas nuschaivlas e pervia da la midada dal clima – da reconuscher l'interdependenza, da deducir strategias che mitigieschan la ristgasco er da formular mesiras e recumandaziuns per la pratica. Il program è vegnì lantschà l'onn 1984 ed è vegnì amplifitgà successivamain fin oz. Il program d'observaziun cumpiglia actualmain 185 surfatschas da gaud. En il chantun Grischun datti otg surfatschas da retschertga. Las enconuschientschas na resultan betg sulettamain dals resultats sin las singulas surfatschas, mabain cunzunt da la cumparegliaziun tranter

las surfatschas ch'èn repartidas en tut la Svizra. Las lavurs da perscrutaziun vegnan fatgas da l'institut privat da biologia vegetala applitgada a Schönenbuch en il chantun Basilea-Champagna. Las lavurs vegnan finanziadas dals chantuns participads al program. La perioda actuala dal program dura fin il mars 2017.

Ulteriuras contribuziuns per renovar mirs sitgs

Per renovar mirs sitgs en las vischnancas Andeer, Ardez, Arosa, Brusio, Guarda, Lumnezia, Luzein, Scharàns, Tarasp, Tumeigl e Ziràn-Reschen ha la regenza garantì ina contribuziun chantunala en l'autezza da 119 173 francs or dal fond da la lottaria naziunala. La confederaziun paja ina contribuziun da la medema autezza. Ils mirs sitgs, sco mirs da cunfin e da posa, èn en bleras regiuns dal Grischun perditgas impurtantas d'ina cultivaziun tradiziunala. Els n'han betg mo ina gronda impurtanza per l'istorgia culturala, mabain er per l'ecologia e per la cuntrada. Senza als mantegnair van blers da quests mirs en decadenza. Il matg 2014 ha la regenza già sustegnì renovaziuns da mirs sitgs en differentas vischnancas cun 163 500 francs.



La regenza grischuna sustegn la renovaziun da mirs sitgs.